

**DISPOZITA TË LIGJIT PËR NDRYSHIMIN DHE PLOTËSIMIN E
LIGJIT PËR AVOKATIN E POPULLIT**

(“Gazeta Zyrtare e RM”-së nr. 114/2009)

Neni 1

Në Ligjin për Avokatin e Popullit (“Gazeta zyrtare e Republikës së Maqedonisë”, numër 60/2003), pas nenit 11 shtohet nen i ri 11-a si vijon:

Neni 11-a

Avokati i Popullit siguron mbrojtje të veçantë për të drejtat e fëmijëve, personat me nevoja të veçanta dhe personat që janë objekt të torturës dhe llojeve tjetra të trajtimit brutal, jonjerëzor, nënçmues ose ndëshkues në organet, organizatat dhe institucionet në të cilat liria e lëvizjes është e kufizuar.

Neni 2

Në nenin 21, paragrafin 3 pas fjalës “persona” shtohen fjalët: “me nevoja të veçanta”, ndërsa pas fjalëve: “si persona të cilët janë objekt të torturës dhe llojeve tjera të trajtimit brutal, jonjerëzor, nënçmues ose ndëshkues në organet, organizatat dhe institucionet në të cilat kufizohet liria e qarkullimit”.

Neni 3

Pas nenit 31 shtohen dy nene të reja 31-a dhe 31-b, si vijojnë:

Neni 31-a

Avokati i Popullit gjatë monitorimit të gjendjes në lidhje me respektimin dhe mbrojtjen e të drejtave kushtetuese dhe ligjore të personave në organet, organizatat dhe institucionet, në të cilat liria e lëvizjes është e kufizuar, ndërmer aktivitete në përputhje me Ligjin dhe marrëveshjet ndërkombëtare të ratifikuara në përputhje me Kushtetutën e Republikës e Maqedonisë.

Avokati i Popullit për realizimin e aktiviteteve nga paragrafi 1 të këtij neni bën vizita të rregullta dhe të paparalajmëruara në organet, organizatat dhe institucionet në të cilat liria e lëvizjes është e kufizuar për çka përgatit raport të veçantë.

Për mënyrën e realizimit të vizitave nga paragrafi 2 të këtij neni Avokati i Popullit miraton rregullore.

Neni 31- b

Personat zyrtarë të organeve, organizatave dhe institucioneve, në të cilat liria e lëvizjes është e kufizuar, janë të obliguar që Avokatit të Popullit t'i mundësojnë qasje të papenguar në të gjitha dokumentet dhe informatat që kanë të bëjnë me personat të cilëve u është kufizuar liria e lëvizjes.

Personat zyrtarë të organeve, organizatave dhe institucioneve në të cilat liria e lëvizjes është e kufizuar, janë të obliguar të veprojnë sipas rekomandimeve dhe udhëzimeve të Avokatit të Popullit dhe për veprimin ta lajmërojnë më së voni në afat prej 30 ditësh, llogaritur nga dita e pranimin të raportit të veçantë.

Neni 4

Pas nenit 34 shtohet nen i ri 34-a, si vijon:

Neni 34-a

Gjobë në shumë prej 500 deri 1.000 euro në kundërvlerë me denarë, i shqiptohet për kundërvajtje personit zyrtar në organet nga neni 2 të këtij Ligji, i cili nuk do të veprojë në përputhje me dispozitat e nenit 31-b, paragrafit 2 dhe nenit 34, paragrafit 1 të këtij Ligji”.

Neni 5

Në nenin 45, në paragrafin 1 pas fjalës “fusha” shtohen fjalët: “ose për grup të caktuar personash vulnerabil”.

Pas paragrafit 1 shtohet paragraf i ri 2, si vijon:

“Avokati i Popullit formon seksione të veçanta për mbrojtjen e të drejtave të fëmijëve dhe të personave me nevoja të veçanta, seksion për mbrojtjen e qytetarëve nga diskriminimi dhe tortura dhe llojet e tjera të trajtimit brutal, jonjerëzor, nënçmues ose ndëshkues, si dhe seksion për përfaqësimin e drejtë dhe adekuat të qytetarëve.”

Paragrafi 2 bëhet paragraf 3.

Neni 6

Neni 48 ndryshon dhe thuhet:

“Mjetet për punën e Avokatit të Popullit sigurohen në zërin e Buxhetit të Republikës së Maqedonisë, të dedikuar për Avokatin e Popullit.

Propozimin për mjetet për punën e Avokatit të Popullit, përpara dërgimit të propozimit të Buxhetit të Republikës së Maqedonisë, Avokati i Popullit e harmonizon me Qeverinë e Republikës së Maqedonisë, përmes Ministrisë së Financave.

Në votimin e Buxhetit të Republikës së Maqedonisë në seancën e Kuvendit të Republikës së Maqedonisë detyrimisht merr pjesë edhe Avokati i Popullit, i cili e arsyeton propozimin e përlogaritjes së zërit të Buxhetit të Republikës së Maqedonisë, të dedikuar për Avokatin e Popullit.

Me shfrytëzimin, shpërndarjen dhe dedikimin e mjeteve për punë, të siguruara nga zëri i Buxhetit të Republikës së Maqedonisë, Avokati i Popullit disponon në mënyrë të pavarur.

Kuvendi i Republikës së Maqedonisë voton ndaras për zërin e Buxhetit të Republikës së Maqedonisë të dedikuar për Avokatin e Popullit.”

Neni 7

Aktet nënligjore, të parapara me këtë Ligj, do të miratohen brenda afatit prej gjashtë muajsh, nga dita e hyrjes në fuqi të këtij Ligji.

Neni 8

Ky Ligj hyn në fuqi në ditën e tetë nga dita e shpalljes në “Gazetën Zyrtare të Republikës së Maqedonisë”.